

四庫全書

史部

欽定四庫全書

史部

延祐四明志卷十六

五至

詳校官編修

臣

曹振鏞

檢討

臣

德生覆勘

總校官編修

臣

王燕緒

校對官中書

臣

郭晉

謄錄監生

臣

范從理

欽定四庫全書

延祐四明志卷十五

元 袁楠 撰

祠祀攷

祭法立五祀謂法施於民死勤事勞定國禦大菑捍大患則祀之繇是祠祀日繁自無而有神之情也故神無形而有用事神之說盡是矣吳越俗尚機鬼援是五者爭趨奉之烏得而廢諸作祠祀攷

社稷壇 風雨雷師壇附

社壇舊在子城西南一里所謂社壇橋是也宋亡社廢
皇元改建今在鄞縣城西隅大鄉橋風雨雷師壇今在
鄞縣甬東隅

鄞縣

社壇風雨雷師壇以附郭未建

奉化州

社壇在州之西南二百步

雷雨師壇置於社稷壇內

風師壇在州東北五里

昌國州

社壇在州西門外去州一百步

風雨雷師壇未建

定海縣

社壇在縣西南郊

風雨雷師壇宋附東海王廟

慈溪縣

社壇在縣西南郊

風雨雷師壇未建

象山縣

社壇在縣西二百步

風雨雷師壇未建

本路城隍

廟在于城西南五十步梁貞明二年刺史沈承業建宋

嘉定九年攝守程覃奏賜額曰靈佑

舊志云漢紀信漫不可考

奉化州

廟在州西五十步唐咸通六年建

昌國州

廟在州南城内宋建炎四年賜額曰惠應

舊志曰鄉人茹侯

鄞縣

廟以附郭不建

慈溪縣

廟在縣西四十步

定海縣

廟在縣東七十步梁貞明二年建

象山縣

廟在縣西南二百四十步唐神龍二年建

在城神廟

純德徵君廟西北距舊子城五十五步唐刺史崔殷作

碣銘徐浩書大歷十二年立

後漢至行董君諱黯字叔達句章人也依乎中庸率性
純白少孤獨立事親不匱歡菽以盡其歡柔色以溫其
省高堂登壽慈顏衰如和以肥家安不擇地其徙居也
庭出寒泉其執喪也林集祥鳥明誠必感厥德惟懋施
及千載橫於四海其大孝也歟夫大道未隱不獨親親
逮德下衰乃有慈孝行以名蕩情以禮飾季武矯而服
縗子春強而過禮此離道以善非天性之孝也子云無
違參則直養素冠有諷和琴不成此禮經之孝也文舉

棄子士游出妻動非先意何以觀適雖曰可紀或近沽
名此非教之孝也夫子一與之質道與之和生於東溟
介居夷島俗遠詩禮性復著存無貽一日之憂終報共
天之怨負土成壟枕干不言卒斬東鄰祭於中野所謂
生知而上成心以隨欲蓋而彰強名曰孝加於古之君
子數等矣和帝聞其異行特捨專殺之罪召拜郎中不
起竟以壽終夫受命於時惟松柏也冬夏青青稟靈於
天唯夫子也能全正性六代祖仲舒漢太中大夫嗣孫

宇春領廬江太守世為郡中名族故以董孝名鄉慈溪
署縣鄮江之俗薰然遺風皇唐大厯八載余分竹茲郡
訊古欽賢環堵已蕪遺記將落徘徊故邑尚想餘範則
夫子之行可以德類於人葺宇崇祠昭銘垂代豈不務
矣銘曰

白刃可蹈仁鮮能存黃金可鑠德無間言道喪於季賢
生復古知禮近義變風於魯豈曰無衣寒燠以寧豈曰
無魚泉流在庭黃鳥哀音下感棘心哭無常聲灑血盈

襟江水湯湯東注窮越夫子德音與之不絕

靈應廟北距子城二里半今在西南隅畫錦橋東額曰
永泰王廟宋以來累封為忠嘉神聖惠濟廣靈王邑人
樓扶為之記曰

我國家肇造區夏仁覆羣生懷柔百神咸秩無文非有
德於民者不祀道浙而東四明為樂國繇晉以來靈應
為著祠繇歷千載民依怙若慈父以其司一城之命故
皆以府主稱闡靈播徽家繪人祝而未嘗驚動以禍福

譬諸祥風甘雨其入人也深其潤物也博人陶粹和物
用阜蕃優優大哉豈惟捍災禦患水旱疾疫必禱焉而
姦芽亂萌消弭於冥默之中者未易以形迹數簪纓蟬
聯日盛以滋四民熙熙懷土安業宵爾神化日用不知
歲少不登藉海鬻以活連檣白粲間擬他往必儒衣示
蠻以徠之訓以卑佑至巨室厚藏吝糴者亦然賈帆天
際命寄鯨波乘危一呼恃以無恐島夷貢琛既岸匍匐
肅謁所謂未施敬而敬者廟食隆盛昭於一方與海邦

相為無窮社哉聖朝褒表功德綸命赫奕貴極王封崇
列八字而麗牲有碑豐績未紀庸非斯文之闕乎爰撫
譜牒暨封爵歲月顯揭之以詔來者王姓鮑諱蓋其先
東海鄒邑人春秋鮑叔顯於齊西漢有宣與兩龔同傳
至永昱事光武世為司隸王其苗裔也初二親籲天祈
嗣母晝寢夢吞日有娠在胎三載晉泰始三年九月望
日而王始生祥光燭室與前夢協命童名曰圓照既冠
美鬚眉容貌秀偉平生賦性沖粹器度宏遠語言慷慨

敬老慈幼恤貧軫孤好游俠任氣節以擊鮮弋禽為樂
見山中石以為鹿而射之既中視之石因名之為鹿山
東海魚龍相角海濱民甚患苦之一日有客艤舟岸旁
而王舟至客問適從何來王謂客曰海口一大魚與衆
小魚競小者將其羣鬪甚銳大者力苦不敵遂奮楫擊小
魚中之雄者因射之退餘亦俯首奔潰霧斂風息大魚
鼓鬣掉尾似有喜色客甫歎息一老叟霜髯鱗裘至王
前鞠躬謝且曰吾職東海有年而九江小龍逞驕結儔

暴吾廬適會戰勢孤幸子助我而今而後海淵安靜如初皆子之賜子異時必廟食願遣息女為嬖妾王謙謝母戲言史擲水翻浪微露鱗角而去王屬客勿復言請別遺一小楫後人因號其所在曰小楫客盛傳其事疑信者半之然自是波濤息驚其說益驗王娶湖上方氏明淑能守節生一子絕肖迺翁篤好詩書王既薨建興四年葬鹿山即射石之所後三十年夢告其子我當再生可啓我冢墓次夜妻夢復然謀於親黨皆曰此非常

事當如夢及發棺尸儼然如生但無出入息耳衣服潔潤若朝夕所服用冢四角燈燄然州人聚觀加敬迺乘雲而昇練真養神蟬蛻塵表道家謂尸解者豈其是乎冢間得一爐非金非石籀文曰東海之寶永和初穆帝聞其異詔取爐褚太后曰神物也緘香遣還許丘祠王又夢呼其妻若子曰東海龍遣女在茲汝當會既而相繼以終因並祠鹿山墓旁梁大通末越有奴抄寇三千並海郡邑積歲罹其禍王因巫者語刺史定襄侯蕭祗

曰爾揚我武我濟爾功君第行必以八月十三日破賊
至期寇至餘姚失潮舟膠衆惘然若昏醉官軍悉縛
之武帝詔崇其祠唐神功元年八月八日王降於縣東
門托鄉童終日而歌曰吾姓鮑氏廟食於此自昔及今
四十餘紀馬行水林縣必遷徙家在鹿山不堪居止鄞
水西流北接甬水給事祖室實吾之廬汝為我請早為
改圖待免化龍遇齊得王移汝來封日月交光萬載無
窮我歌章章父老同守人等告於令柳思古乞更置尉

宗魯賢謂甬水有楊給事宅其子承奉郎弘道遂乞捨
故父給事郎公遺宅為廟他無覲特乞子孫嗣掌祠事
其世世無易鸞臺侍郎攝春官尚書狄公仁傑繳奏故
至今祝史皆楊氏吳越有國規度而崇奉之舊相傳稱
永泰王莫詳所始崇寧二年三月浙東鈐轄尚書豐公
稷奏犯名改威烈六年三月路侍郎允迪守直龍圖閣
樓公异以雨暘應祈乞封王爵封惠濟王宣和三年六
月太守李公友聞奏睦寇竊發及剡魔巢洞距州近藉

神休不能侵詔加賜額靈應政和八年九月路侍郎允
迪使高麗奏加忠嘉建炎四年二月高皇帝南巡護風
濤若平陸詔加廣靈嘉定四年九月故侯樓公之聞孫
鑰參知政事告諸朝曰時和歲豐神有大賜於民願顯
揚其先以及後昆詔封王父協應侯王母協惠夫人元
妃靖順夫人次室昭順夫人王子順助侯紹定間王示
夢於史衛王彌遠作新廟端平三年今太傅丞相鄭越
公清之奏易威烈為神聖有取大而化之聖而不可知

之義復以尚書袁公甫之請詔加王父協應同慶侯王
母協惠順慶夫人嘉熙元年正月同日告頒吁王之福
吾邦也至矣而邦人欲報之德與天地並聲音笑貌云
乎哉信乎其為祥風甘雨也扶家世晝錦密邇祠下目
覲心祇思答神貺秉筆無一溢語里之人因語曰春而
祈秋而謝牲肥酒香簫鼓喧還無虛日至誕日遠近輻
輳可思歸美侑祀之詩以聲之其詞曰

帝閤開兮遙昇載雲旗兮從霓旌晚舊鄉兮揚靈心獨

直兮爲民正奠朱宮兮欽止被潤澤兮大豐美鄧之山
兮鄧之水草木葱葱兮黍稷薿薿望飛帆兮天一涯假
祥飈兮安歸指商牆兮東之既飲食兮人莫知令海若
兮無波魚鱗鱗兮盛多王之顏兮益康以和舞蹲蹲兮
鼓坎坎進桂酒兮聲斯感福吾民兮樂只歲其有兮自
今以始民之報兮何千萬祀

飲飛廟子城一里二百步鹽倉之西昔有碑今亡故神
之姓氏邑里無傳攷之淮南子云荆有飲非得寶劍於

干遂還渡江中流暴風揚波兩蛟夾繞其舟飲非瞋目
攘臂拔劍赴江刺蛟舟人盡濟按宋建隆中鄆令金翊
纂異記謂唐武德時以此郡為鄆州至開元中改鄆為
明郡名奉化城號甬東地名句章軍號飲飛攷此則飲
飛廟者蓋出於當時之軍號而軍必有將之者往往有
功之人故人為之祠云大觀初本州所編九域志乃引
淮南子所謂荆有飲非不知淮南子之非實非是之非
非飛走之飛今廟榜稱荆飲飛侯豈非好事者附會其

說而增以荆字歟

舊志所辨次非之說如此今存之然軍號次飛未必不
取義於荆次非之勇古字轉用甚多何必於非飛二字
疑之或云旁有蛟池蛟自江來窟於此人患之故鎮以
廟池今為居民所侵堙塞無幾或云唐末刺史黃晟初
以次飛都副兵馬使防遏寇盜保護鄉井沒而人祠之
不曰刺史而曰次飛蓋自領兵時人倚為重故習稱舊
號云

大人堂舊志云在子城北射圃中今在總管府之東北
地黃叔雅云大人堂高閑撰記謂錢億祠土人不敢稱
其名尊曰大人新志疑之按億俶弟乾祐二年判明乾
德五年終於任首尾二十三年開寶八年姪惟治為節
度創祠以奉蓋子弟尊諸父之通號家語曾子曰參得
罪大人漢書高帝曰大人常以臣亡賴矧億浚湖築塘
修它山堰等有功於民建奉國節自億始惟治在鎮又
五六年繼此遂列祠於五廟若闕燔吳越家臣無顯功

無緣錢氏子弟肯祠今所謂闕相公者以燔錢氏臣曾
守此土從祀其旁後遂知有闕不知有億或訛而為吳
太傅闕澤澤慈水人不曾守此土郡未移治不應先有
此祠

奉國軍樓祠在郡之鼓角樓神號旗纛將軍有禱輒應
舊志書不載按運判戴公埴鼠璞載云唐百官志節度
使陞辭日賜雙旌雙節行則建節立六纛縣既入境乃築
節樓迎以鼓角宋有六纛門旗二受朝廷之賜藏之公

宇在私室則謂之節堂朔望次日祭之曰衙日盖有旌節則有神祀因號旗纛將軍凡節鎮所在皆重此祠宋明州係奉國軍節度使祠之本始其亦取此

東嶽行宮在報恩光孝觀東宋紹興十年郡守仇愈所建知觀袁志賢募緣而成有聖母池人或竊物相與詣聖母前啓白投楮鏹於池其浮者為曲人以此畏之

五龍堂唐刺史李伉以天壽院天井歲旱禱雨輒應欲邦人便於奉祠於開元宮建五龍堂且為記以著靈異

其畧曰

在天莫如龍龍之德佐天地養萬物百穀賴以生四海所共尊者也社祭土稷祈穀國之重典也既立壇以享其神矣則龍之靈翔風灑雨澤枯槁滋稼穡可不嚴尊酬之所哉余受命牧明人四月戾止六月大旱俾吏具香酒敬祈於五龍之神有蜥蜴狀者躍入杯中飲酒復出緣器上顧吏久之跳躑而去吏未返雨已大注由是生植茂遂闔邑豐衍思所以崇祀事答神休者迺建宇

爽塏依方塑像以時薦饗時咸通六年季秋之末也宋
乾道四年郡守張津以舊宇庫隘移創於報恩光孝觀
之申地觀即開元宮也今存

東嶽奉聖行宮在東南隅獅子橋東唐朝建立宋建炎
兵火歸然獨存至元二十六年燬大德間主奉陸貴和
募緣重建世奉祠云

張帝廟舊附靈濟院佛殿之右宋淳祐六年制帥顏頤
仲勅於院之南火後僧復建鄉人趙隆孫為之記

白龍王廟在延慶寺東宋嘉定十五年見像重建

五顯靈順廟在城西南隅宋開禧年間鄉人徐侍郎守徽州神嘗效靈迎香火建廟於此

皮場廟在月湖聖功寺內宋累封為明靈昭惠顯應王元在汴顯仁坊皮角場故名

蕭王廟在貫橋側此處舊有佛閣乃行刑之地因立鄭侯廟云

鄞江廟在東南隅獅子橋東舊有鄞江門故建

海神廟在東渡門裏

茶場廟在東北隅拱星坊北

東殿廟在東北隅

達信廟在東北隅

東嶽行宮縣東三十二里近阿育山

廣靈王行廟在城外甬東隅

顯跡廟乃鮑王舊塚尸解之地在縣東南三十里青山

鬼谷先生祠在縣東六十里太白山南滄嶼水簾洞幽

深閒寂人跡罕到夏侯曾先地志云鬼谷子廟三面連山前有清溪之水泉源不竭山崖重疊雲霧蔽虧郭璞曾到有遊仙詩曰

清溪千餘仞中有一道士雲生梁棟間風吹牕牖裏借問此阿誰云是鬼谷子

按鬼谷子祠在處有之不知孰是

又有一祠在

縣東三十里

淵靈廟在阿育王山廣利寺環廟有聖井七自東晉時已著靈異中井有二鰻其一金線自腦達於尾其一每

觀光耀折芥引之則雙紅螭或二鰕前導而後出焉錢
武肅王以歲旱命九華長老十善大德興國中所謂五
叔太尉者同迎置錢唐之南塔寺山間鑿石為井立亭
其上以倣聖井而鄮山井山二鰕游泳自若錢唐憲公
為旱用紫羅帕布井中蟹先入靈鰕後隨以銀缸貯沙
泉養之置道場有天花散漫之瑞僧統贊寧嘗著護塔
靈鰕菩薩傳邦人禱雨必即之宋元祐元年賜額乾道
二年守趙伯圭禱有應知鄞縣事李柄記於石或云又

有二井在山絕頂險峻不可至

靈波廟在縣西廣德湖唐賜額靈龍特封廣德宣聖王
宋熙寧七年改賜今額鄞宰張珣與陳光祿忠恕奉勅
建

白龍王廟在縣西二十里靈波之別廟也

石嶼廟在縣西四十里嶼有靈鰻能興雲雨

力施廟在縣西南四十里

秋浦廟在縣西南三十五里

殷浦廟在縣南一十里

遺德廟在縣西南四十里它山堰旁唐太和中鄆令王

元暉築堰扞水入小江湖灌溉甚博

詳見河渠考

民德而祠

之封善政侯宋咸平四年廟重修蘇為記之乾道四年

七月八日賜額縣宰楊布書守張津所立重修善政祠

記載集古考

嘉澤廟在東錢湖青山下唐天寶中令陸南金宋天禧

中守李夷庚皆濬湖興利民德之故合祠焉水滂旱蝗

有禱必應嘉定二年賜今額李侯又有祠堂在天童山景德禪寺千佛閣之東

豐惠廟在廣德湖望春山宋政和七年樓昇守鄉郡廢湖為田人為立祠嘉定二年賜今額

濟顯廟在縣西南六十里即四明山之天井其井凡三有金線蜥蜴能顯靈興雲雨郡旱禱之必應宋嘉定九年賜今額

詳見天壽寺

吳刺史廟在城西門外九里堰唐大歷年間刺史吳謙

字德裕有善政郡民歎血而祠之宋王荊公宰鄆詣祠奉祀詩云山色湖光一樣清桑麻穀粟荷君情至今民祀年年在莫負當年歎血盟前朝請大夫王應麟譔記云

明自唐開元為州城西門之外有祠耆耄云大歷中州刺史吳侯廟也侯諱謙字德裕官水部員外郎史策軼其傳郡乘闕其蹟遺愛在民歎血奉嘗春秋蘭菊悠久弗懈余艤舟扶藜過廟下式瞻貌像問其故則曰侯守

是邦開西郊之湖膏澤滲漉甫田登成其地為九里堰
因以名廟歷載緜邈民猶曰吾使君也召棠勿翦韋碑
未刻王文公宰鄆為詩以識山色湖光之句遺黎誦之
余肅然欽歎斯所謂盛德至善民不能忘者乎語鄉父
老曰古者建祀以為民也民功曰庸自稷以來是尊是
奉以水佐耕豐稼於野芍陂七門之祀芬至今未泯惟
明潁海厥土舄鹵歷選良守溉田興利孔內史之於句
章隲任刺史之於廣德湖皆載在簡牘今唯鄆令之王

列在祀典他無所紀侯之牧我民也不求焯焯之譽而實德著於人心不為皦皦之政而流澤被於後世若昔河南守吳公治行為天下第一而史無可書之事言漢循吏為稱首侯豈其苗裔歟河南治聲止一時候自大厯迄今五百有餘載民思無斁於前修有光焉咸以無心為感允以無言為說此秉彝好德之良心也越俗機鬼史巫紛若邪怵妖誘匪經禮攸迪無知氓不蠲烝亦罔能穀於赫仁賢食報茲土正大昭明允合光聖王之祭

澆染醴馨潔永永必享豐年叶氣惠我無疆其孰曰不
宜父老曰謚哉盍饒諸麗牲之石時萬時億承神嘉祉
余既書其事又作迎送神詩俾歌以侑其辭曰坎擊鼓
兮鄴水許思仁侯兮昔召父隰九里兮醜流為雨水決
決兮芄芃麥黍鴻隙陲兮謹荳茅侯嘉跡兮依其在渚
神之來兮飈輪下蘭觴勺兮薦椒醑民不忘侯兮歌且
舞侯不忘民兮俾寧宇神之歸兮娛瑤圃格顯穹兮降
多祐屢豐穰兮除疾苦年千世百兮保艾吾土事侯如

存兮侯其福女敬共承祀兮無怠終古又詩云城西有
祠臨水渼翠松列植路如砥問之耆老此為誰唐大厯
中吾刺史刺史為民開陂湖故蹟猶傳堰九里年年簫
鼓報豐穰決渠為雨潤澤美遺愛有橋名懷恩姓名不
載太史氏昔漢吳公治第一列傳寂寂名無紀刺史豈
其苗裔歟明州政亦河南比堂上大書荆公詩蘭菊春
秋百世祀地志祇稱王長官有功於民盖一揆吾聞是
邦多賢守裴王碑字顏與李懽侯盛德著人心彼石可

焚祠弗圯廣德湖為鴻隙陂召棠藥社誰敢毀杭稌充
羨侯之賜廟食長存如此水

猛將廟縣東二里神姓李名顯忠高宗避難神扈駕防
送御舟出海祥飈送颿賜爵猛將重節武功大夫水旱
疫癘蕃舶海船有禱輒應撥官地一片興建祠宇

靈顯廟縣南四里世傳鄭世忠建炎年間隨駕至鄭死
於王事邑人義而葬之於金谷里陳嶼後隆之原屢顯
靈異有功於民開慶元年賜今額

天妃廟在縣甬東隅皇慶二年重建延祐元年十月內
欽奉制書愛人利物仁克著於重溟崇德報功禮宜增
於異政肆頒綸命用舉彝儀護國庇民廣濟明著天妃
林氏聖性明通道心善利當宏往納來之際有轉禍為
福之方祥飈送颿曾聞瞬息危檣出火屢闡神光有感
必通無遠弗屆顧東南之漕引實左右其憑依不有褒
恩曷彰靈跡於戲爵以馭貴惟新懿號之加海不揚
波尚冀太平之助可加封護國庇民廣濟明著天妃主

者施行

慈溪縣

靈應廟在縣東一里即廣靈王行祠也

純德徵君廟在縣東北一里慈溪因孝子得名而舊無祠宇附祀於城隍宋建炎間縣令林叔豹於靈應廟西建祠堂遷像而祀之紹興三十二年郡戶曹董鄰攝邑於普濟寺之西建廟久而圯慶元二年縣令朱堂增修行禮部尚書樓鑰記之

張孝子祠孝子諱無擇唐永隆初中明經科仕至中散大夫和州刺史墓在虎胛名山去縣西三十里無擇仕於朝則忠居於家則孝李孝逸將兵討亂公贊謀有功父袁州司馬卒公丁憂於神龍元年奉棺歸葬此山負土結廬三年不櫛七日絕漿感芝草湧泉之瑞鄉人虞彥之百餘人詣州舉之都督竇懷正按驗得實以聞孝行著聞今古稱歎服既禪辭祿廬墓二十年以終身從葬司馬墓博士賀知章誌於墓宋嘉定十四年邑士

字夢林請於縣立祠與純德董孝子春秋並祀著作郎
張慮記墓久屬他人侵佔宋德祐元年有孫張景雲善
繼先志慨捐已資竭力回復太學博士陳大震記皇朝
凡舉行大禮累命有司躬詣墓下致祭

靈感廟在縣西北七十里地名向頭山宋建炎四年封
靈應侯

五聖廟一在縣東南一里一在縣西南一里

東嶽行宮祠在清道觀之西去縣治一里

驃騎將軍廟在縣東南二十五里會稽典錄云漢世祖張意為驃騎將軍後隱於山遂立廟以祀之

祠山張王行祠在永明寺開禧初縣尉施子升始建殿宇宋寶慶二年縣令周符尉莊鎬募衆廣其殿宇水旱疾疫人必禱焉

定海縣

東海助順孚聖廣德威濟王廟在縣東北五里宋元豐元年安燾陳睦奉使高麗還上言請建東海神廟於明

州定海縣詔元封淵聖廣德王崇寧賜額崇聖宮大觀
加封助順宣和加封顯靈仍封附祀風神曰寧順侯雨
神曰寧濟侯建炎加封祐聖淳化二年秘書李至言東
海廣德王廟在萊州南渡道絕詔加東海正祀典也初
度道士以奉祀紹興間請額焉為淵德觀因遷神像於
廊東紹定年間立殿以奉之

東嶽行宮縣東北五里招寶山下宋紹興八年建

助海顯靈侯廟在縣西五里侯姓孔象山翁浦人行

第七性剛烈鄉人憚之死於海有劉贊者夢侯曰上帝錄吾善命為境神已籍水府吾屍泛於沙浦君能收葬創數楹俾有棲托必為民利贊訪問果如夢即所居葬而祠之錢氏有吳越靜海鎮將以排筏航海驚濤危甚夢侯許以冥助即順風而濟乃立廟於鎮兵部侍郎皮光業為之記宋高宗幸海道賜額顯靈

洋山廟在縣東北五里即昌國州煬帝廟之行祠也

廣靈王廟在縣西北三百步宋宣和五年方臘亂邑人

賴神陰佑故立廟於此

昭利廟在縣東北五里宋宣和五年侍郎路允迪給事中傅時卿出使高麗涉海有禱由是建廟

覺海威顯侯廟在縣南一十里舊號山仙廟宋建炎高宗幸海道賜今額開禧二年令商逸卿修建新閣且記之

陳山忠應侯廟在縣南一十里舊號陳相公廟宋建炎高宗幸海道賜今封

雲霄三公廟在縣東南八十里與鄞境接廟不知所自
始其神冕而九旒垂黼纁被山龍黼黻為旱禱輒應主
簿永嘉戴相記之謂穀梁氏所謂應乎上公而通乎陰
陽者也

樞密承旨卞公祠堂在縣東北五里至元二十六年子
朝列大夫卞燾同知府事痛父死王事乃於山下為立
祠作記

象山縣

東嶽行宮在縣西南二百五十步棲霞觀之側宋大觀
中建

昭應廟在縣西北一百四十步舊名圓峰祠唐會昌中
王闕撰文宣王廟記有云自圓峰祠歷城隍廟則此祠
其來尚矣或以為縣主山形圓因名之一日午自其舊
祠飛片瓦止於今廟之基邑人姜臯因遷焉境內嘗歲
饑瀕海窘糴忽有米舟抵岸謂邑人曰昨有扁舟招吾
來者自云居縣西山下既而詣之乃廟也觀神像驚愕

且拜即平價盡糶衆賴以濟宋建炎四年海寇猖獗將抵邑境陰霧陡變舟楫旗幟甲兵衝突風電大作賊舟沈溺乃遁去使臣冉進欲為亂劉帥見一急足告變乃斬冉等於廟側是歲賜今額凡水旱疾疫禱之必應累封靈澤孚佑昭貺顯濟侯咸淳四年封英惠濟烈公

冲應真人祠在縣西南二百五十步蓬萊山之下透瓶泉之北與棲霞觀同建真人姓陶諱弘景舊封貞白王欽若靈驗記云梁朝真人修藥於蓬萊觀自寫真於東

壁有居觀側者晨起必望觀瞻禮常販於天台一旦隨舟渡海將及縣颶風大作舟欲傾沒同舟七十人見一道士乘雲隱約黃色光芒中以羽扇約風曰陶真人相救毋怖畏言訖風息既濟其人引同黨至觀見真人像如舟中所覩遂相率修飾觀宇以答焉宋祥符元年營昭應宮自永嘉掄巨材浮海至邑南風濤幾溺舟人於空中見道士謂曰吾象山蓬萊觀陶真人也且救汝須臾安濟慶厯中道士鄭日徽更造殿宇而壁間所寫真

遂泯其徒嘗以鯁素募留副本有誠禱者則幅巾黃服
隱然現壁間淳熙末令王椿為旱禱像現而雨上其事
錫封冲應真人

普濟廟縣東南三十五里舊曰鋸門廟

祚聖廟本東門廟在縣南一百里世稱其神曰天門都
督按天門山在南海中而接寧海之東境故號東門下
有石閭最為湍險船舶往來必致禱焉唐貞觀間有會
稽販客曰金林祭畢誤持胙肉去行十餘里忽逆風復

漂廟下乃悟所誤亟加祈謝即反風安濟永徽間又有
工人曰蔡藏自泉州造佛像回獲緡錢數百祀禱少懈
舟發數里而覆宋建炎四年賜今額

白鶴廟在縣城內神姓趙名炳字公阿東陽人能方術
事見東漢書徐登傳台州人祠之甚謹象山舊為台屬
邑故亦祠焉宋嘉祐六年令陳玠銘於石

顧長官祠在縣城內長官名方字正夫丹陽人宋皇祐
末登進士第調象山今日召邑人父老詢民利害勸善

懲惡建學舍教子弟頻為講解誘進於善逾年民大化
後方疾篤邑人為之致禱者近千人竟卒於五百里之
內號泣慕戀相與立祠丹陽錢君倚毗陵胡完夫上饒
州何籀記其事於石

昌國州

黃公祠在東海晉天福三年建按舊志云賈充問於會
稽夏統統曰黃公之高節而會稽典錄亦稱人材則有
黃公潔已暴秦之世然則四皓之一也或引張平子西

京賦東海黃公赤刀與祝冀厭白虎卒不能救之語今
兩存之

岱山廟在北海中世傳隋末陳稷沒後顯靈於此

烈港廟在金塘之烈港乃廣德軍張王之行祠也宋紹
興二十年都巡檢使李仝建

徐偃王廟在州東地名翁浦俗呼為城隍頭十道四蕃
志云徐偃王城翁洲以居其址今存按史記載偃王之
敗北走彭城武原東山下以死疑非此海中而韓文公

為衢州廟碑乃記曰偃王之逃戰不之彭城則之越城之隅棄玉几研於會稽之水則四蕃志或可信矣

洋山廟在東北海中唐大中四年建黃洽記云海賈有見羽衛森列空中者自稱隋煬帝神遊此山俾立祠宇宋建炎四年高宗幸海道以煬帝不可加封特封其二妃為惠妃順妃夫人為明德夫人勅藏於廟并刻於石

奉化州

東嶽行宮在州東北四里虛白觀後

城隍廟在州西五十步唐咸通六年縣令李宗申建燬於兵火至元二十六年尹李天益重建延祐七年知州馬稱德重修

誠惠廟在州東三百步州有山曰日嶺嶺有恠石高七八丈遠望屹如婦人十道四蕃志所謂奉化新婦嶺者是也唐立廟曰貞固夫人之廟宋景祐年間縣令子房廢以增學不久復宣和四年賜額紹興三十一年賜號昭德夫人其詞云朕閱輿圖之籍知日嶺之山有石

肖人而能錫人之福水旱盜賊之禱應如響答心甚異
焉豈烈婦正女一念堅固先天地而常存形寓於石使
人觀感而化者可百世祀乎維神聞於有唐廟號於宋
朕今明煥恩寵以徽稱從民欲也其侈神休答斯民所
以告朕之意嘉定甲申加封順應咸淳乙丑加封福祐
云

顯佑廟在州南鮎埼鎮神姓仇廟創于唐禱之輒應宋
嘉定三年賜今額參政樓公鑄記其事十七年封靈惠

侯

欽飛廟州北門一里即府治欽飛之別廟也

延祐四明志卷十五

欽定四庫全書

延祐四明志卷十六

元 袁楠 撰

釋道攷

天台之學獨盛於四明其教以體用為宗吾儒言理深有取焉或曰易師常言之矣孰先後焉禪學錄雪竇顯而言辭振宏智覺以妙密微旨窮極踐理為洞下傳學者難繼之老氏別傳為役鬼神禳水旱王侯多而祠醮

益修作釋道攷

布袋和尚

布袋和尚者唐末有僧形裁眼睞感額瞠腹杖荷布囊
隨處偃卧時號長汀子雪中體不濡示人禍福輒應將
雨則著草屨亢陽則曳木履梁貞明二年於奉化岳林
寺東廊坐逝偈曰彌勒真彌勒化身千百億時時示時
人時人自不識葬寺西南二里曰彌勒庵宋元符元年
賜號定應大師三年祥光現於墓所得錫杖淨瓶邑人

建閣藏之崇寧三年賜閣名崇寧舊志云

僧知禮

知禮字約言金氏子居城之白塔巷巷以禮得名十五
祝髮為僧從寶雲義通傳天台學僧曰法界有次第汝
當奉持禮曰何謂法界僧曰大總法相圓通無礙是名
法界禮曰既曰無礙次第安有居三年輒蒞講席咸平
三年郡大旱與僧遵式燃指祈觀音負薪曰果不雨當
焚身三日雨大至式後居天竺號式懺主俱以道行名

者也撰不二門指要鈔有僧難之復有慶昭智圓詰難書具在曰山外禮所言今皆宗之毫析縷計白首莫能盡也而立懺自誓舉世莫敢廢天禧間修法華懺顯四淨土之道將自焚翰林學士楊億駙馬都尉李遵勗勸止之不聽郡守李夷庚復以理勉迺止真宗聞其名賜號法智大師遣內侍至寺俯修其所懺法華儀三日後有其徒仁岳求觀心觀佛之旨密註書斥禮禮知之為作十三科大抵其書以開權顯實為宗而約以體用雙

峰饒氏北山陳氏言性理皆宗其凡例所註書見釋氏書目趙清獻為碑陳忠肅晁詹事皆尊事其說天台智者之學禮為中興焉

僧本如

本如句章人初學於法智問經五義法智云如能為吾掌事三年當語焉事畢有請法智偈之曰本如如遂有悟為頌曰處處逢路頭頭是故鄉本來成現事何必更思量法智肯之講說教論泛者如歸慶厯二年駙馬都

尉李道勗請於朝賜號神照嘗居白蓮寺有虎睡西南隅以杖擊之曰非汝所居虎俛首而去歿之夕所居梁棟折有聲著仁王懺儀趙清獻作行業碑

僧介然

介然鄞人從明智中立師居南湖通觀音燃指建十六觀與其徒相誓曰念佛三昧往生要法也金人犯明州士庶奔散然守觀不去酋騎掠至叱曰汝不畏死耶然曰願力在觀室誠不忍去酋曰我北歸亦欲效此制作

遂強挾以歸後人追思遂以其去日為忌尊為定慧尊者塑像於觀側

僧智連

智連字文秀鄞人學於圓照梵光嘗與宏智登千佛閣智曰聞四明講教言空中有相光曰誠然智以手指太虛曰本無一物其相安在連指山川樓閣此諸物象復是何物智服其言後居南湖史太師與師游問曰師於禪律能貫通邪連曰冰泮雪消固一水耳又問華嚴般

若何支離連曰支離所以為簡易號覺靈師隆興元年十二月十八日逝明年正月太師生子彌遠將就蓐見連入室因名之曰覺老樓鑰評之曰心大而行密體卑而道尊恭而不勞博而不雜寂用之涯不可測

僧普交

普交鄞縣萬齡鄉人幼學天台教修懺儀人有問之曰懺罪在已已罪何來若懺他罪汝焉能懺交不能對遂造泐潭入門即訶擬問即杖交不知所以一日潭呼曰

交來吾與汝共議古今公案交擬進復唱之由是有省
機辯敏發後居天童修持清苦其逝也獲五色舍利陳
肅公嘗贊之

僧正覺

正覺隰州人年十四受戒具學於丹霞淳向子諲漕淮
南器重之主泗州普照建炎間主天童金人犯明諸寺
俱燬獨覺危坐不去掠騎至塔嶺乃還寺僧舊不滿二
百人覺納衆千二百人主事者憂之覺笑曰非汝所憂

翌日嘉禾錢氏致粟千斛歲大饑為食貧民鑿萬工池一夕有蜀僧叩覺門密謂曰師集工繁廣弟子有乾承術願以進遂以建器實水銀和少藥覆之貯湯缶上須臾有聲出果銀也覺曰吾亦能之遂以承納口端坐逾時出之亦銀也僧愧謝去洞下宗旨以鎮密納息絕聽視守心如嬰兒學者難之至覺為再興臨濟之學語言為機用其徒實繁蓋其道未易學也其時宗杲主育王覺語杲曰明年當逝去杲以辯說自高數侮覺至期

覺屏絕人事者三月杲忽曰吾當過天童送覺禪師西
歸覺將治沐浴杲念以為未可信肩輿以歸急使邀杲
回至則已端逝矣杲泣下為之削髮舍利凝刀不再舉
迺展拜曰平時自號善說法今不如師矣詔諡宏智禪
師所為語錄行於世其文麗則如洞下宗旨云葬天童
山袁桷曰慶元多名山皆有道德者居之然非里人今
獨傳宏智何耶謂其終始此山洞山之道世不得聞繇
宏智始興興即微豈是道果不可易學邪後之禪人覽

是宜有感焉

僧妙堪智愚妙源

象山慈溪多僧得三人曰妙堪堪持律善規矩僧不如
式者即撻之主育王歲有善士禮釋迦求現塔僧有隨
觀者堪逐去之惡僧為塔宮悉撤去將死治銀合十餘
以貯舍利預示寂期戒其徒至期火葬煙所出俱舍利
頂骨舌俱不壞

智愚少游方後得法於運庵為偈頌善出新意辯說鋒

湊叢林推之主育王吳丞相潛判慶元極尊敬問曰師
語錄願序引以傳不朽愚謝之歸語人吳潛晚歲如病
風人禍將至吾豈願其文邪語聞於吳吳大怒械於獄
以他罪杖之未幾吳敗貶死愚時年八十詔主徑山
妙源字晉之清苦峭厲貌寢薄嘗衣蘆花衣服鐵衲口
誦佛號不輟每跣足乞僧食於道得法於智愚愚晚歲
在徑山源為演法代其酬答從者如林其言曰佛去世
久其言在後皆蹈襲之戒律隳壞將日甚吾能歲化一

人知因果誠不負佛付囑也善代答其入室機峰電疾
卒不可搏縛風止水靜意泊如也主定水問學滿戶外
後示寂願以身飼烏鳶善為唐詩類張武于雪竇妙高
亭詩人傳誦之

僧善月

善月字光遠定海人母夢月入於懷後出家遂名善月
蓋古佛名也居南湖問如來不斷性惡之論有省史太
師以月波處之學者雲集太師曰廩食不足吾為師辦

郡守何澹呂師居南湖凡十三年後居上竺歲旱詔迎
大士於明慶車駕親幸月以禱雨應補左街僧錄史忠
獻問月曰慾何能斷答曰日遠月忘或問以安心曰心
本不動又問法華經藏曰當處全彰晚歲著論不輟有
楞嚴玄覽金剛會解圓覺畧說楞伽通義等書嘉定至
淳祐天台之學月為冠壽九十三

僧傳古

傳古四明人工畫龍建隆初名振京師嘗於明州國寧

寺畫龍於壁觀者奇之徽宗作畫譜定畫龍高下呂傳
古為第一宣和所藏有三十曰袞霧戲波龍二穿石戲
浪龍二吟霧戲水龍二踴霧出波龍一吟霧踴波龍一
爬山踴霧龍二踴霧戲水龍一穿石出波龍二穿山弄
水龍二出水戲珠龍一戲雲雙龍一戲水龍圖四出洞
龍圖一翫水龍圖二出水龍圖一祥龍圖一吟龍圖一
戲龍一戲水龍一坐龍一

僧奉真

奉真鄞人善醫熙寧中名聞東都天章閣待制許元為
江淮發運使奉課於京師時欲入對而其子疾亟瞑而
不食惛惛欲逾宿矣使奉真視之曰脾已絕不可治死
在明日元曰觀其疾勢固知不可救今方有事須陞對
能延數日之期否奉真曰如此似可諸臟皆已衰唯肝
臟獨過脾為肝所勝其氣先絕一臟絕則死若急瀉肝
氣令肝氣衰則脾少緩可延三日過此無術也乃投之
藥至晚遂能張目稍稍復啜粥明日漸蘇而能食元極

喜奉真笑曰此不足喜肝氣暫舒耳無能為也越三日果卒奉真之為醫也其診視之妙不差銖分奉真號善濟其法傳之元覺元覺傳之法琮及了初無能續其焰馳聲一時相傳蓋三世活人無慮千百數

見沈存中筆談

昌國州

寶陀寺在州之東海梅岑山佛書所謂東大洋海西紫竹旃檀林者是也唐大中間有西域僧來燔盡十指頂禮洞前親感菩薩現大人相為說妙法授以七色寶石

神通變化遂顯於此後日本國僧慧諤自五臺山得瑞
相欲返故國舟抵新螺礁諤禱之曰使我國衆生無緣
見佛當從所向建立精藍有頃舟行竟泊於潮音洞下
有居民張氏目睹斯異亟舍所居雙峯山卓庵奉之俗
呼為不肯去觀音院郡聞遣幙客迎其像置城中為民
求大吉祥已而有僧即大衆中求嘉禾刻像扃戶彌月
工竟而僧不見今之儼然趺坐於紺殿者是也宋元豐
三年內殿王舜封使三韓至是有大龜負舟不得去望

山作禮忽龜沒而舟行泊還以其事上之錫今額紹興
元年易律為禪辛亥真歇了禪師解會長蘆南遊浮海
於此結庵榜曰海岸孤絕處由是飛錫此山者皆具曹
溪正法眼藏疇非禪林之秀嘉定七年賜圓通寶殿四
字大士橋三字載新梵宇八年德韶以佛照禪師法嗣
來主叢林值中殿賜金錢喧動都城緇白從化韶乃裒
所施剏龍章閣唯大士以三十二應身入諸國土現八
萬四千手臂目接引羣生與五臺之丈殊峨眉之普賢

為天下三大道場歸附後至元十年住持僧如智捐衣鉢之餘建接待寺於沈家門之側以便往來者大德三年欽奉詔旨撥賜鄆縣湖田二十頃翰林直學士朝列大夫知制誥同修國史劉賡撰碑銘云國家自世祖聖德神功文武皇帝奄有四海凡名山大川仙釋所托以神其教者什植新弊畢乘興運今上皇帝龍飛以來鉅剎殊庭天降地湧盖予以揚前人之休光行萬世之慶澤澗水東慶元昌國有山名補怛洛迦者奇巖複嶂幽

洞靈巖錯立層出於奔波駭浪之中潮汐吐吞烟靄變
幻螭虬龜蛇蜿蜒呵衛華巖經所謂善財第二十八參
觀自在菩薩與諸大菩薩圍繞說法此其地也寺曰寶
陀創始汴宋元豐初爾時靈跡率隨緣影示現香花與
五臺巖道寶類而旱澇風濤之禱響答尤捷其在東南
故是佛法一大海會無論遐邇卑尊靡不皈依瞻仰今
上皇后福德日盛一念中間母慮皆佛事迺大德二年
春特命中御府臣李英驛降御所祝香使還載命修繕

其像設之宇明年春宿衛臣博囉等實行載馳祝香內
出中金百兩飭江浙行中書省遣僚吏同泣其役又明
年春宿衛臣魏額森岱酬三馳祝香銜命飯僧問閱貝
典竣事寺之長僧如智偕其徒言致奉玉琢菩薩瑞相
表上內庭以便瞻禮且歸美報今年春仍命岱酬偕李
特穆爾布哈魏額森持五綵旛旌侑祝香以往莊嚴其
法筵又內出寶幣二千緡即其寺治演法之堂暨廬舍
之圯腐彫剝者又飭行中書捐土田之在官者二十頃

畀之益其徒食俾歲以建寅午戌月諷誦祈禱又下璽書復其凡隸寶陀者非寶陀者禁其毋得怙以匿冒如智亦因被賜袈裟內帛傳瑞流恩曾無虛歲至是命中政院臣傳命翰林臣俾用文字而刊貞石以貽永久臣既據實銓次如右竊謂象教之來中土雖顯晦靡常其所護念亦不專係夫崇奉敬怠陛下以寬簡而治民殿下以慈祥而佐理與往聖覺皇同符共貫是宜圖精薦釐方祇效祉至若金湯迦維亦曰我國家之常事其所

以逌續延洪之道自有大本大原在也臣因明其所在而繫之以詩皇元混一其仁如天好生惡殺慈視竺乾帝繩祖武仁守大寶曰臨曰御盡循堯道后嗣徽音所寶惟慈力行萬善念茲在茲繫我彼補怛法真際白衣如來東漸西被如來大智無古無今慧日滿月無不照臨天開崇因祠香歲致應復為感匪徐匪亟布金檀幣即而招提舊仍新就離立翬飛僧智表陳如來昭晰玉琢妙嚴象其光潔補怛非遙浙水之東法身圓對奚必梵

宮教旨崇之勝幡是錫申畫沃腴益其香積俾勤梵唄
為國禱祈斂時五福敷錫靡私誕降璽書以鎮以護山
河大地等為樂土恩德所覃震耀無前帝仁后慈億萬斯
年惟觀自在非聞非見圓融理性神光畢現優曇鉢華
瑞應孔彰皇圖釋網相為無疆詞臣承命作頌其職揆
厥本原懋昭大德

潮音洞

東洋大海西面大洋海南有洞在馬嶺巖下瞰迴顧羣峯去寺三理由寺至洞下地皆黃砂佛

書所謂金沙鋪地者是也向有大士橋亘乎洞前為潮所齧

善財洞

潮音洞右亦神通顯見之地巖有罅峭峻而蹙狹其中竊不可測外有石壁立泉溜為滴珠久

而不竭人謂之菩薩泉

盤陀石

平廣可坐百餘人下瞰大海正扶桑出日之地燭龍將駕天光煥發五色爛然頃焉一輪從海

底湧出其大者不得而名者

三摩地

寺之西偏登山者由此有亭極清淨嘉木森秀清泉紺冽亂石錯出詭形怪狀不可模寫焉

真歇庵

寺之深處舊了禪師修道於此

無畏石

真歇庵之前突然一石其形方而廣峻不可陟

獅子巖

無畏石之側

正趣峯

靈鷲峰

觀音峰

前越王史公官西監因浮海詣潮音洞下焚香作禮
大士具正法眼顯見奇特聲聞空中有結果寇萊之
語越王嘗記所見於寺壁今模而刊諸石

紹興戊辰三月望鄱陽程休甫四明史浩由沈家門泛
舟遇風掛席俄頃至此翼蚤恭詣潮音洞頂禮觀音大

士至則寂無所覩炷香烹茶但椀面浮花而已歸寺食訖與長老瀾公論文殊揀圓通童子入法界事晡時至洞再俯伏苔磴凝睇巖空惟亂石纍纍興盡欲返有比丘指曰巖頂有竇可以下瞰攀緣而上瞻顧之際瑞相忽現金色照耀眉目瞭然二人所見不異惟浩更睹雙齒潔白如玉於是咸懷慶快作禮而退既而泊舟還甬東懼此話無傳用書於壁庶幾來者觀此無疲厭心不一至不見而遂已也

在城禪院五

天寧寺在西北隅惠政橋唐為國寧寺大中五年置宋
崇寧四年改崇寧萬壽政和元年改天寧萬壽紹興七
年改報恩光孝建隆間康憲錢公億建鐵塔徙奉化岳
林寺深沙神於西廊乃工人王百藝極雕刻之巧而為
之嘗現光明鼠雀不敢近建炎間寺燬而其室巋然獨
存皇朝至元十九年寺復燬僧可舉重建為祝聖都道
場至大二年正月火於倭人

萬壽寺在東北隅大梁街唐咸通十三年史君周景遇
捨解宇以建仍捨田以贍賜額慧燈宋開寶間重建大
平興國七年改崇壽政和八年改廣慧建炎四年燬重
建嘉定十三年燬即復或謂慧字從心從彗於星皆火
識也改萬壽是日東北隅火環寺而寺獨存人咸異之
皇朝至元十九年火至大二年又火

吉祥寺在東南隅新排橋東晉天福五年建六年以釋
天院為名宋太平興國八年賜今額嘉定間火復建皇

朝至元十九年二十六年至大二年三經火

能仁觀音寺在西南隅舊號報慈瀕月湖西宋建隆間
節度使錢公億捨宅為之成於太平興國間記云面枕
平湖門橫綠野為四明望藍也觀音像以諸香衆寶莊
嚴其像初賜承天宣和改能仁建炎兵火之變大士夢
於人亟移郊外淨嚴院於是獲存復迎以歸懇求無不
應嘉定中以其地賜丞相史魯公移其額於大慈山景
定年史氏歸地復寺門有十洲舊址之一在湖之濱皇

朝至元二十六年僧判蘇昌普建一室以奉大士善財

保聖寺

缺

教化十方七

延慶寺在東南隅倉東周廣順三年建曰報恩院宋至道中僧知禮講天台教行學聞於朝真宗遣使加禮異之是為法智大師大中祥符三年改延慶元豐年法智曾孫介然建十六室為禪觀紹興十四年賜教額寺之大悲閣有辟支佛舌舍利并普賢像嘉定十三年僧以

像小欲廣之剖其臟得書云動此者水火為災未幾寺
燬像滅丞相史魯公重建扁曰南湖福地至皇朝至元
二十六年火僧善良重建

天竺慈雲式懺主悼四明尊者詩二首

法智大師行業碑趙抃作

淨土院記陳瓘作

寶雲寺在西南隅行春坊東宋開寶元年僧義通字惟
遠本高麗人自三韓來譽振中國知禮尊式子衿是其

門人之上足漕使顧承徽捨宅為義通傳道處實名傳
教僧逾二紀而逝既荼毗弟子收骨葬於育王山之陽
累石為塔有記侍御王伯庠書刻於石太平興國七年
賜額寶雲昭其祥也建炎嘉定燬於火皇朝至元二十
六年至大二年又火

白衣廣仁寺在西北隅廣仁坊唐長興元年建號淨居
報仁院俗呼白衣觀音院清泰二年為淨居續因祈禱
靈應加報仁宋治平元年賜今額初節度使錢公億解

宇之梁見白光綬紋脉有觀音相乃易其木刻觀音像
寘於寺郡守周邦彥捐金建青蓮閣建炎四年火至皇
朝至元十九年復火僧道全重建朱翌登白衣寺鐘樓
詩云憑高直欲馭西風百里纖毫盡發蒙樓觀相
望秋色裏江山爭麗海光中雲容入座如相識足
力緣梯尚不窮肯使詩成誇得意撞鐘驚起坐禪
翁

興聖寺在西北隅西牆下唐咸通十年建舊號牆西院

宋大中祥符八年賜額本尼院也建炎兵火後改為男僧寺

太平興國寺在西南隅木蘭橋西唐開元二十八年建號太平興慶宋太平興國八年改今額本寺舊有子院三曰浴院曰經藏院曰教院寺有泗洲像長尺餘先是於福明橋水中時見光景入水得之因加嚴飾崇奉于寺嘉定十三年火後教院重建為十方皇朝至大二年

火

乾符承天寺舊志作能仁羅漢殿在西北隅富榮坊北
唐為乾符寺尋廢咸通八年復建名藥師院後又為承
天宋政和七年賜額寺有子院二曰法華教院曰羅漢
律院後能仁法華廢惟羅漢院在皇朝至元二十一年
有司例復舊基僧道全重建先是法智尊者修教觀於
此

天壽白雲寺在西北隅皇朝至元二十一年僧建無二
庵扁曰白雲精舍大德二年官司改今名為天台教寺

律十方院七

五臺開元寺在東南隅唐開元二十八年建以紀年名會
昌五年毀佛祠寺亦廢大中初刺史李敬方請於朝詔
復開元寺乃即國寧寺舊址建焉寺西南高原有崇陰
亭郡守殷僧辨廢亭以其材增建於佛殿寺之三門亮
闍黎建亮號月山能文善談論道行高潔邦人敬之日
閱藏經積施利為之殿有維摩問疾相東廡有梵王帝
釋四天門王行道變相天神天男天女歌樂形相皆協

律以盡極其藝之精妙吳越畫中寶也其樂蓋霓裳羽衣曲調云嘗有廣利大師誓光者住此寺善草書工畫辭辯過人昭宗聞其名召至闕講寺有二碑其一李頻文其一陶祥校書文韓擇木書又有不肯去觀音先是大中十三年日本國僧惠諤詣五臺山敬禮至中臺精舍觀觀音像貌端雅乃就懇求迎歸其國衆從之諤即肩舁至於此將登舟像重不可舉率偕行賈客竭力舁之乃克勝及過昌國梅岑山濤怒風飛舟人懼甚諤夜

夢一僧謂之曰汝但安吾此山必令便風相送謬泣告衆以夢咸驚異乃誅茅結廬置其像而還因呼為不肯去觀音其後開元寺僧道載夢觀音欲歸此寺乃創建殿宇迎奉之邦人祈求輒應亦號瑞應觀音唐長史韋絢嘗紀其事宋太平興國中重飾舊殿曰五臺觀音院以來自五臺山故也駱登吳矜皆有記呂叙之寺有子院六曰經院曰白蓮院曰法華院曰戒壇院曰三學院曰摩訶庵唯開元為甲乙住持為十方也嘉定十三年

火惟五臺戒壇重建為十方皇朝至元二十六年復火
今起蓋漸完

湖心廣福寺在西南隅西湖之心舊號水陸冥道院俗
謂湖心寺宋治平中建熙寧元年改壽聖院紹興三十
二年改今額係十方傳律講去處為放生池道場乾道

初太中趙伯圭建廣生堂有記朱翌撰

記今人
集古攷

經藏寺在東南隅舊係太平興國寺子院本甲乙今為
十方嘉定十三年火徙建於舊寺之東皇朝至元十九

年至大二年連燬

羅漢應真院在西北隅即能仁羅漢院唐為乾符寺咸通八年復建名藥師院又為承天政和七年賜額寺有子院二曰法華教院曰羅漢律院後能仁法華廢惟羅漢院存徙東南隅壽昌廢基上皇朝至元十九年火二十一年有司復其地

景福寺在東南隅舊號水陸蓮花院宋建隆二年建大中祥符三年改今額皇朝至元十九年火

東壽昌院在東南隅唐清泰二年僧子麟禪師往高麗
日本并百濟諸國傳持天台教法高麗國王遣使李仁
旭輩送還明州錢氏因贖徐蘊卿園地建院以安其衆
晉天福七年吳越王命以為保安院宋治平元年為永
安大觀二年賜今額嘉定十三年紹定元年兩經火
景德寺在東南隅唐清泰元年建號鄞江院宋大中祥
符元年賜額寺有教院在西偏嘉定十三年火廢為民
居皇朝元貞元年有司移文例復僧判呂輦真重建

甲乙徒弟教院八

境清興法寺在東南隅唐咸通二年建始僧鴻紹因南門外水陸院基為柳亭院復號境清宋大中祥符元年賜今額嘉定十三年火皇朝至元二十六年延燬遂復其舊今徙於茲以南門外舊基建化壇屬本寺

保安寺在西北隅宋紹興間有僧師韻卓庵修道或訐其私置庵毀地奪於有力者淳熙中史忠定王請東湖上水廢寺額畀韻弟姪師璨清俊重建皇朝至元十四

年復廢至元二十一年有司例復重建

西壽昌寺在東南隅東壽昌之下院也宋嘉定十三年火廢為民居皇朝至元二十五年有司例復舊重建大德元年展拓聿新

天封院在西南隅唐通天登封年間建僧伽塔高十有八丈以鎮郡城漢乾祐五年建天封塔院宋大中祥符三年改今額建炎間燬紹興十四年郡守莫將重建嘉定十一年火廢為民居皇朝至元二十三年有司例復

建猶未完

大中祥符寺在東南隅天封塔北周廣順元年號崇福寺宋端拱中僧從信以精琴既至京師召見賜食齋金帛錫號三惠大師大中祥符元年賜額嘉定三年火廢為民居皇朝至元二十四年有司復舊重建二十六年復燬

崇教寺在西南隅袞繡坊唐乾符元年建宋大中祥符元年賜今額建炎燬於兵皇朝至元二十五年至大二

年復燬

廣福院在西南隅木蘭橋西漢乾祐二年建號羅漢院
宋太平興國九年賜今額嘉定十三年火重建皇朝至
大二年火

聖功寺在西南隅本崇教院也周顯德元年建宋真宗
詔內侍裴愈訪名山勝跡奏改今額皇朝至元二十六
年火重建

尼寺

戒香十方寺在西南隅唐大中元年建舊號白檀寺宋祥符元年賜額嘉定十三年火重建皇朝至元二十六年至大二年兩經燬未復舊規

普照寺在西南隅唐咸通三年建號福明院宋大中祥符元年賜今額嘉定十三年火重建皇朝至元二十六年復火重建

興教寺在東南隅丘家橋南梁貞明二年建號新居禪院宋大中祥符元年賜今額嘉定十三年重建皇朝至

元二十六年火

奉聖寺在西北隅衍慶坊唐天祐二年建號淨居禪院
宋大中祥符元年賜今額嘉定十三年火重建端平間
請今額皇朝至元十九年火重建

普寧寺在西北隅舊為庵舍嘉定十三年賜額即燬皇
朝至元十九年復火

庵舍

鎮明嶺觀音庵在西南隅府治前一里三十步本一丘

阜天禧中守李夷庚以土增之為佛亭嘉定十三年火
次年市民重建觀音殿紹定元年守胡榘書圓通道場
以表顏頤仲因感大士夢撥田拓舊皇朝至元一十六
年至大五年火今已復

普門經堂在西北隅虹橋巷皇朝至元二十六年係沒
官房屋建

竹林精舍在西北隅朝士坊皇朝至大二年土民胡源
建

延祐四明志卷十六